

Ruth

Ola Stori Blanga Ruth

Pat 1 Neiyomi en Ruth

Storimen: Wal dijan stori im blanga det widogel neim Ruth, en hau King Deibid femili mob bin kamat brom im na. Nomeda im hasbin bin dai, bat stil God bin lukaftumbat im brabliwei. Ola pipul la dijan stori

Neiyomi en im hasbin Alimalek

Im dubla gajin **Ruth en Orpa**

Bowes bin ful kantrimen weya imin lukaftumbat Alimalek en imbin jidanbat deya langa det taun kolum Bethlahem, langa det kantri Juda.

Ful kantrimen bla Boes, weya im jidan langa det taun kolum Bethlahem.

Det boswan blanga Boes wekinmen

Olgamen brom Bethlahem

Speshalwan lida mob

Longtaim bifo eni king bin jidan bos langa ola Isreil pipul, deibin ol ranat blanga daga deya langa Juda. Deibin abum brabliwan draisisan, dumaji nomo eni rein bin buldan, en ola daga bin binij.

Wal wan Isreil men, neim Alimalek hubin jidan deya langa det taun kolum Bethlahem bin go langa najawan kantri gulum Moweb garram im waif Neiyomi en im dubala san. Olabat bin jidan deya na, dumaji deibin faindim daga deya en dubala san bin faindim waif deya du, neim Opa en Ruth. Bambang na Alimalek husbin blanga Neiyonmi bin dai langa det kantri. Det dubala san blanga Neiyomi bin dai, en det olgamen bin jidanbat deya langa det kantri miselp na, onli abum im dubala gajin na.

Bambang na Neiyomi bin gedim gudnyus brom im ron kantri. God bin gibit olabat mowa daga igin.

Wal Neiyomi bin gowei brom det kantri Moweb. Det dubala gajin bla im bin wandi go garram det olgamen du langa det kantri Juda. Bat hafwei langa roud det olgamen bin dalim dubala.

Olgamen Neiyomi: Yunbala gobek langa yunbala ron kantri na.

“Wal yunbala bin brabli gud langa mi en seimwei lagijat gin YAWEI garra lukaftumbat yunbala.”

Storimen: Brom deya det olgamen bin holdim dubala,

Olgamen Neiyomi: Bobo

Ruth & Opa: “Nomo! Minbala wandi kaman garram yu langa yu kantrimen olabat.”

Olgamen Neiyomi: Wotfo yunbala wandi kaman garram mi? Ai kaan merrit tunait en abum san blanga merrit langa yunbala. Yunbala sabi ai kaan abum enimo biginini,

Storimen: ¹⁴ Brom deya det dubala gel bin kraikrai, en afta Opa bin sei gudbai langa im gajin, en imbin gobek langa im ron kantrimen. Bat Ruth bin grebum im gajin adbala.

Olgamen Neiyomi: “Ruth, Opa bin gobek la im kantrimen olabat en langa im drimin mob du .Wal yu gobek garram im du.”

¹⁶ **Ruth:**, Ai garra kaman garram yu, en eniweya yu garra jidan, ai garra jidan garram yu du. En blanga yu kantrimen, dei garra jidan main kantrimen du. En blanga yu God, im garra jidan main God du. ¹⁷ Wujei yu dai, ai garra dai deya du. Ai kaan larram enijing kadimat yunmi.

¹⁸ **Storimen:** Bambai na dubala bin kamat langa Bethlahem, en wen dubala bin jidin deya, ola pipul bin lukinat langa dubala brabliwei, en ol detlot olgamen deya bin stat jinginat hepiwei blanga Neiyomi,

Olgamen mob brom Bethlahem:

“Tharran Neiyomi kaminap garram sambodi, indit?”

"Hu det sambodi?"

Olgamen Neiyomi: ²¹ Wen aibin gowei brom dis kantri basdam, aibin abum femili en ebrijing. Bat najing na.

Storimen: Wal lagijat na Neiyomi bin kambek brom det kantri gulum Moweb garram im gajin neim Ruth, brom det najawan kantri. Wal imbin taim blanga gedimbat ola sid daga en pudumbat langa ola haus.

Pat 2 Ruth bin midap garra Bowes

Storimen: Wal Neiyomi bin abum Bowes hubin ful kantrimen blanga det dedbala hasbin blanga im,

Ruth: “Yu larram mi go langa fam blanga gedimbat detlot sid daga.”^a

Neiyomi: “Orait. Yu gin go.”

Storimen: Brom deya Ruth bin go langa wan fam, en imbin gedimbat detlot gras garram sid weya ola wekinmen bin oldei libumbat biyain. Det fam bin blanga Bowes. Bat Ruth nomo bin sabi det fam bin blanga im. ⁴ Bamba na Bowes bin kaman brom taun blanga luk im fam, en imbin luk ola wekinmen deya.

Bowes: G'dei yumob. YAWEI det trubala God garra album yumob

Seken Boswan: En YAWEI garra album yu du.

Bowes: Hu tharran yanggel?

Sekan Boswan: Imbin kaman brom det najawan kantri gulum Moweb. Imbin kaman langa yunmi kantri garram det olgamen Neiyomi, ⁷ en imbin askim mi blanga larram im bulurum ola wekinmen blanga gedimbat sid daga.

Storimen: Brom deya Bowes bin go en imbin tok langa Ruth,

Bowes: “Yu lisin langa mi na. Yu garra stap iya langa main fam na en yu garra go en gajimbat ola sid daga yu wandim.”

Storimen: Wal Ruth bin pudumdan im hed raitdan langa graun. Imbin brabli gudbinji blanga Bowes.

Ruth: “Wotfo yu alumbat mi? Mi brom najawan kantri.”

Bowes: “Aibin lisin ebrijing weya yubin dumbat blanga det olgamen Neiyomi. Yubin gud langa im, en ai sabi yubin libum yu ron kantri bla jidan garram dislot streinja pipul.
¹² Yubin kaman langa YAWEI det trubala God blanga ola Isreil pipul, en im garra lukaftumbat yu. YAWEI garra jingabat langa yu, Ruth, en im garra alumbat yu, dumaji yubin lukebek langa main kantrimen.”

Ruth: “Yubin brabli gudbala langa mi, en yubin meigim mi brabli gudbinji wen yubin tok lagijat.”

Storimen: Wal Ruth bin gobek langa wek na, en wen imbin dinataim, bowes bin singat la im.

Bowes : “Yu kaman iya en idimbat dis lilwan daga.”

Storimen: Wal Ruth bin go langa detlot wekingel blanga Bowes, en Bowes bin gibit im detmatj kukwan daga raidap imbin bulap binji. Ruth nomo bin binijimap, en imbin lafta gibit det daga langa det olgamen Neiyomi. Brom deya Ruth bin go blanga gedimbat mowa sid daga langa det pedik.

Bowes: “Yumob pulumat sambala sid daga du brom detlot gras weya yumob bin taiyimapat, en yumob pudum langa graun blanga det yanggel. En yumob nomo stapam det yanggel gedimibat sid daga eniweya.”

Storimen: Wal Ruth bin kipgon gedimbat detlot gras garram sid daga raidap sangodan.

Imbin abum bigmob sid daga na. ¹⁸ en imbin deigimbek detlot sid daga langa im gajin kemp. Wen det olgamen bin luk detlot sid daga, imbin hatjamp.

Neiyomi : Main gel. Det bos blanga det fam bin teiknodis langa yu. En God garra album im, dumaji imbin brabli gud langa yu tudei.”

Ruth : “Aibin wek langa det fam blanga Bowes.”

Neiyomi : “Bowes! YAWEI garra gudbinj langa im. Ai dalim yu, main gel. God im oldei kipum im wed langa ola pipul. Bowes na im femili blanga main, en ai reken im garra lukaftumbat yunmi.”^b

Ruth : “Najawan ting deya. Bowes bin dalim mi blanga kipgon gedimbat detlot sid daga raidap olabat binij kadimbat detlot gras garram ola sid daga.”

Neiyomi : “Gudwan tharran (den dei), main gel. Mobeda yu kipgon wek langa det fam blanga Bowes.”

Storimen: Brom deya Ruth bin kipgon gedimbat detlot sid daga garram detlot wekingel blanga Bowes raidap deibin binij kadimbat ola gras garram detlot sid daga. Wal Ruth bin kipgon jidanbat deya garram det olgamen Neiyomi.

Pat 3 Ruth bin leiden langa Bowes futwei

STORIMEN: Bambai na det olgamen bin dalim Ruth,

NEIYOMI: Ai garra faindim hasbin blanga yu na. ² Det men Bowes, im ful kantrimen blanga det dedbala hasbin blanga mi, en im garra lukaftumbat yunmi.

“Tudei naitaim im. ³ Wal yu go en bogi, en yu garra pudimon gudwan klos, Yu garra go en lidimap det bleingkit blanga im, en yu garra leiden langa im futwei, en wen im weikap, im garra dalim yu wanim yu garra dum.”

RUTH: “Orait, olgamen. Ai garra dum ebrijing yubin dalim mi.”

STORIMEN: Brom deya Ruth bin gidap, en go la det pleis weya Bowes bin klinimbat detlot sid daga, en deya na Ruth bin dum ebrijing im gajin bin dalim im.

⁷ Wen Bowes bin binij idimbat en dringgimbat, imbin go en leiden wansaid langa detlot sid daga weya deibin hipimap, en wen imbin ded silip, Ruth bin snikap, en imbin lidimap det bleingkit, en imbin leiden la im fut.

⁸ Bambai na midulnait Bowes bin weikap, en imbin geda shok wen imbin faindim det gel leidenbat deya la im futwei,

BOWES,(imin geda shok) Hei Hu yu?

RUTH : “Mi Ruth. Aibin kaman iya dumaji yu ful kantrimen blanga det dedbala hasbin bla main gajin Neiyomi, en yu garra lukaftumbat mi. En if yu wandim, yu gin merrit langa mi.”

BOWES: “Ai gibit theingks langa YAWEI det trubala God blanga gudbala gel laik yu. Bifo yubin lukaftumbat det olgamen brabliwei, en tudei yu kipgon lukaftumbat im brabli gudwei. Maitbi yu wandi go en lukabat yangboi, maitbi ritjwan o powan. Bat najing. Yu nomo bin dum detkain. Yubin wandi merrit langa det olgamen femili.

¹¹ “Wal yu nomo wori na Ruth. Ai garra dum ebrijing yubin askim mi. Ebribodi langa dijan taun sabi yu brabli gudwan gel. ¹² En im trubala tharran deya yubin tok. Mi ful kantrimen blanga det dedbala hasbin blanga det olgamen, en ai garra lukaftumbat yu. Bat najawan ful kantrimen deya im bos oba langa mi.^c

¹³ “Tumarra yunmi garra go faindat if im wandi lukaftumbat yu. Bat if im tok im nomo wandi lukaftumbat yu, wal trubala ai dalim yu. Ai garra lukaftumbat yu brabliwei.”

STORIMEN: Wal Ruth bin leidan langa im futwei raidap alibala.

BOWES: Ruth yu gidap na. Ai nomo wandim enibodi garra sabi yubin iya. Yu gibit mi det lilwan bleingkit, en yu spreadimat iya.

STORIMEN: Bowes bin pudum bigmob sid daga langa im det lilwan bleingkit. Det loud bin brabli hebiwan.

Brom deya Ruth bin gobek langa taun garram detlot sid daga, ¹⁶ en wen imbin kamat langa im gajin kemp.

NEIYOMI : “Wanim bin hepin, mai gel?”

RUTH: “Iya luk,main gajin ola sid daga weya imin gibit mi bla bringimap la yu. Imin dalim mi ai kaan kambek garram no enijing.

NEIYOMI : “Wal yu jis jidan kwait na en weit blanga Bowes. Tudei na im sodimat hu garra merrit langa yu.”

Pat 4 BOWES BIN MERRIT LANGA RUTH

STORIMEN : Wal Bowes bin go blanga abum miting.

Bambai na imbin luk det najawan ful kantrimen blanga det dedbala hasbin blanga det olgamen Neiyomi en imbin jingat langa im,

BOWES: “Yu kaman en jidan iya fes, dumaji ai garra tok langa yu.”

“Yumob bosmen kaman iya en jidan, dumaji yumob garra witnis weya minbala main kantrimen tok.”

“Yu sabi det olgamen Neiyomi? Wal im wandi selim det fam blanga yunmi. If yu wandi baiyim det fam, wal yu dalim dislot bosmen iya. Bat if yu dalim mi na fes so ai gin sabi, dumaji yu garram det rait blanga baiyim fes en mi afta.”

KANTRIMEN: “Yuwai. Mi wandi baiyim det fam.

BOWES: “Orait. Bat if yu wandi baiyim det fam brom det olgamen Neiyomi, wal yu garra lafta merrit langa Ruth, en wen im abum beginini bambai, yu lafta meigim det fam stap langa det femili lain blanga im dedbala hasbin.”

STORIMEN : Bowes bin tok lagijat dumaji tharran bin lowa blanga detlot Isreil pipul wen eni men dai nomo garram eni beginini.

FUL KANTRIMEN : “Wal ai kaan baiyim det fam, dumaji detlot beginini main kaan deigoba det fam. Ai garra hendimoba langa yu. Yu lafta baiyim.”

STORIMEN : Wal det najawan men bin deigmat im but, en imbin gibit det but langa Bowes, dumaji det lowa blanga detlot Isreil pipul det taim bin lagijat na.

BOWES : “Yuwai. Mi garra baiyim det len.”

STORIMEN :Det but shoum ola pipul det dubala men bin agri gija.^d

BOWES: “Yumob lisin na. Tudei na aibin baiyim det fam brom Neiyomi. Aibin baiyim ebrijing blanga main dedbala kantrimen en im dubala dedbala san.

DET NAJALOT SPESHALWAN LIDA MOB: “Yuwai. Mibala witnis blanga yu. En mela askimbat YAWEI det trubala God blanga meigim Ruth gibit yu bigmob beginini. En detlot beginini weya YAWEI garra gibit yunbala Ruth garra meigim yu jidan garram bigmob femili.”

Det femili lain blanga King Deibid

STORIMEN: ¹³ Brom deya Bowes bin merrit langa Ruth, en YAWEI bin brabli gudbinji langa dubala en dubala bin abum bebi boi. Deibin kolum in Obed en Neiyomi oldei maindimbat im.

OLGAMEN MOB: “Mibala holot gibit theingks langa YAWEI det trubala God. Im na bin gibit yu grensan, en det grensan garra meigim yu rili hepiwan, en im garra maindimbat yu brabliwei wen yu brabli olgamen ”

STORIMEN : Bambang na wen Obed bin growap, imbin abum san neim Jesi, en wen Jesi bin growap, imbin abum san neim Deibid (Maitbi yumob sabi det stori blanga Deibid en Galyaith). En imin jidan King oba ola Isreil kantri. Longtaim afta Jisas bin kamat brom det famil mob na.